

## ■ ARTG PERSONAL

**Gratulaziun a Trin:** A Trin Digg festivescha oz, ils 6 da schaner 2016 *Carl Caffisch-Eggenberger* siu 70avel gi da nashientscha. Ad el gratuleschan e giavischian vinavon tut il bi e bien sia consorta Vreni, lur fegl Claudio cun partenaria, lur feglias Sonja e Prisca cun partenaris. Segir vegnan sco empremas gratulantas las biadias Mira, Moana e Malia. Tar Carl ed era tatta Vreni han adina grond placher cu ellas vegnan sin viseta. Plinavon portan ils megliers salids ils dus frars cun famiglias e la sora cun partenari, lu ils consulars dall'annada 1946. Tut ils amitgs, parents, enconuschents e vischins da lunsch e da maneivel semettan era en retscha dils gratulants. Ils dalla suprazionza dalla Cuminonza romontscha Trin selegran d'astgar gratular a lur president che trai gie il tgamun da quella d'uront 23 onns. Viva Carli, e stai vinavon aschi fits sco ti eis e che nus astgeien lurvar aunc gitg ensemen. Nus giavischein a ti e tia famiglia ina biala fiasta e tarmetein ils pli cordials auguris. *Elsa Caprez*

## ■ DIOCESA DA CUERA

## Spirituals giubilar 2016

(anr) La gliesta da spirituals giubilar dalla diocesa da Cuera per quest onn ei liunga. Ord nossa regiun eisi ils suandonts:

70 onns: pader *Baseli Drack* OSB, claustra Mustér

50 onns: sur *Ignazi Pally*, Ruschein  
25 onns: sur *Reto Nay*, Glion; pader *Frantisek Pistrak* OP, spiritual, claustra Glion.

Ils spirituals giubilar ein envidai pils 26 da settember 2016 a Cuera.

## ■ DIETA MUNDIALA

## La regenza polaca dat 23 milliuns

(anr) La regenza dalla Pologna metta a disposiziun 23 milliuns euros per la Dieta mundiala dalla giuventetgna catolica e la viseta da papa *Francestg* a Cracovia. Quella dieta ha liug dils 26-31 da fenadur 2016 en quei marcau dalla Pologna. Il marcau da Cracovia dat ina contribuiziun da 12 milliuns euros. Con ch'il comite local impunda ei aunc buc enconuschent. Ins quenta a Cracovia cun dus milliuns giuven cristians. La davosa Dieta mundiala dalla giuventetgna catolica ha giu liug 2013 a Rio de Janeiro (Brasilia) e custau 110 milliuns.

La Dieta mundiala dalla giuventetgna ei in arranschament dalla baselgia catolica. Organizada vegn quella mingamai per giuven e giuvenas denter 15 e 30 onns tras il cussegl papal per ils laics e la tiara ch'envida. Iniziativa ei quella dieta vegnida 1984 tras papa Gion Paul II che ha giu convocau lez onn per l'emprema gada al «giubileum internaziunal dalla giuventetgna» a Roma. Quella dieta sespleiga egl interval da plirs onns, mingamai en ina outra tiara.

Silvester a S. Silvester:  
Gia allas 5 dalla damaun

■ (anr) Ella part tudestga dil cantun Friburg – el district dalla Sense (Singine) – dat ei ina vischnaunca che ha num S. Silvester. Ella secatta 10 km el sidost dil marcau da Friburg. En quella vischnaunca entscheivan ins buca per la sera a far Silvester, mobein tradizionalmein gia fetg baul la damaun. Il survetsch divin solemn pil di dil patrun baselgia, s. Silvester, ha numnadamein liug gia allas tschun. Rugau vegn specialmein per ch'ei mondi bein cun carstgauns ed animals. El decuors dil davos di digl onn vegnan denton leu aunc auters usits ed occurrenzias viter.

## Unitad duei dar forza

Possessurs da secundas habitaziuns da Mustér vulan fundar in'uniun

DA HANS HUONDER / ANR

■ **Sco en auters loghens dil Grischun duei ei era dar a Mustér egl avegnir in'uniun dils possessurs da secundas habitaziuns. Sco quei che Christian Peyer, in dils iniziants, ha detg sin domanda dall'Agentura da novitads rumantscha eis ei previu da fundar l'uniun primavera proxima.** La nova lescha da turissem da Mustér cloma pli fetg alla cassa ils possessurs da secundas habitaziuns ch'entochen dacheu. Igl alzament ei fruntaus sin reacziuns per part massivas enviers las autoritads politicas e turisticas. Cun ina scuntrada d'orientaziun l'entschatta avrel 2015 han la vischnaunca, Sedrun Mustér Turissem, Penticularas Mustér SA ed Uniun da commerci e professiun Mustér empruau da mitigar la situaziun. Con disventreivels che biars possessurs da secundas habitaziuns ein sin fundament dallas taxas novas ei semussau a quella sentupada. Ussa vulan ils possessurs da secundas habitaziuns s'organisar enteifer in'uniun.

## Gia 100 interessents

Quels dis han ils iniziants dalla Cuminonza d'interess dallas secundas habitaziuns Mustér entschiet a far activamein reclama per l'uniun futura. Mo gia avon che la propaganda vegni instradada havevan gia biars annunziou lur participaziun. «Nus havein gia rodond 100 interessents. La finamira ei segiramein denter 200 e 300», di *Christian Peyer* da Muri el cantun Argovia che posseda ina secunda habitaziun a Mustér. L'uniun che duei vegnir fundada aunc el decuors dall'emprema mesadad da quest onn ha differentas finamiras. Dad ina vart duei la cuminonza representar ils possessurs da secundas habitaziuns, hosps da vacanzas ed affittaders permanents enviers las autoritads, las instituziuns publicas e las organizaziuns privatas. La cuminonza vul s'engaschar a favur da taxas e taglias



Ils possessurs da secundas habitaziuns a Mustér vulan s'organisar ed aschia defender lur interess.

FOTO H. HUONDER

commensuradas sco era per il nez ligiau da quella. «Nus lein era lurvar ensemen cun organizaziuns localas, cantunalas e naziunalas sco era s'engaschar en favur d'in svilup turistic persistent ella regiun», di *Christian Peyer*. Il medem mument vul la cuminonza tgirar il contact denter ils commembers sco era cun la populaziun da Mustér.

## Buca cuntents cun tut

Tenor *Christian Peyer* ein biars possessurs da secundas habitaziuns da Mustér buca cuntents cun igl agir dallas autoritads ton avon sco suenter l'orientaziun la primavera vargada: «La moda e manie-

ra co ei vegn iu entuorn cun nus ei inacceptabla. Quei ha entschiet gia tier l'introduziun dalla lescha nova. Mo era all'orientaziun la primavera vargada havein nus buca survegniu rispostas sin nosas damondas e dapi meins ein recuors da possessurs da secundas habitaziuns tier la vischnaunca aunc buca rispundi. La trasparenza maunca semplamein.» El constatescha che possessurs da secundas habitaziuns ein buca hosps da vacanzas normals. «Nus havein cheu habitaziuns e paghein buca mo taxas, mobein era taglias. Apparentamein ein buca tuts perscharts da quei», puntuescha *Christian Peyer*. La purschida gratuita la stad varga-

da seigi stada fetg buna, mo ella seigi buca exnum quella che vegni nezegiada aschi stedi dils possessurs da secundas habitaziuns: «Nus essan era igl atun ni era d'uront autras stagiuns a Mustér.» Sin sia homepage [www.igzwd.ch](http://www.igzwd.ch) informescha la cuminonza buca mo davart sias finamiras, mobein denter auter era concernent las entradas sin fundament dalla lescha da turissem nova. Tenor la calculaziun dalla cuminonza derivan rodond 700'000 dils 1,2 milliuns francs da secundas habitaziuns, pia varga la mesadad. Igl ei 270 pertschien dapli che quei ch'ils possessurs da secundas habitaziuns pagavan avon la revisiun dalla lescha da turissem.

## «Coworking» – ina nova purschida a Laax

Plazs da lavur per in e scadin e da tuttas uras

■ (anr/abc) Igl ei ina purschida nova el Grischun. Tgi che posseda buc in biro privat sa naven d'ussa lurvar a Laax en in liug public cun tutta infrastruttura necessaria. «Coworking Space» senunna quei biro public che *Markus Boss* ha aviert cugl onn niev a Laax-Uletsch. Egl anteriur hotel Happy Rancho a Laax han *Markus Boss* e *Giulia Caduff* envidau sonda sera ad in apero d'avertura d'ina nova purschida. *Markus Boss* ha transformau l'antieriura ustria El Greco en in biro public ch'ei aviarts per in e scadin e da tuttas uras. Tgi che ha per exempel in biro en Lumnezia ni ella Cadi, ed ei savens sin via, sa lurvar temporeme in quei biro public a Laax. Cheu ha el access allas pli spertas lingias electronicas, sa sebrattar cun persunas d'outras branschas e retscheiver impuls per projects novs. *Markus Boss* ha endrizzau el plaunteren dil hotel Happy Rancho in biro grond sco quei ch'igl ei oz usitau. Sis plazs da lavur ein a disposiziun ad in e scadin.

## Per gliued che sto esser flexibla

Cun sia purschida innovativa da «Coworking Space» emprova il giuven interpredider da promover il svilup dad interpresas regionalas. Sin ina surfatscha da dapli che 200 meters quadrat ha el endrizzau sis plazs da lavur ergonomics cun access agl internet spert. Ina lounge per beiber caffè e schizun ina stanza per conferenzas han ils utilisaders a disposiziun. «Cheu s'entaupan indigens cun hosps da

vacanzas, igl ei in forum pil brat spontan da savida ed experientschas», gi *Markus Boss*. Sia purschida ha era en mira ils proprietaris dad habitaziuns da vacanzas. «Tgei bab da famiglia vegn cun dunna ed affons ella habitaziun secundara per lurvar leu en biro?» sedamonda el. Bein negin. Sche quei um – ni era la dunna – veglien tuttina lurvar in miez gi vid projects urgents e buca disturbar l'atmosfera privata ella habitaziun da vacanzas seigi il plaz da lavur el «Coworking Space»

la caschun ultimativa. «Coworking Space Laax» cumpletescha la purschida che *Markus Boss* aveva gia entochen ussa cun fisioterapia e sport da muntogna.

Agl apero da beinvegni ei era *Jenny Schöpfer*, la presidenta dall'uniun Coworking Switzerland, stada presenta. Sco quei ch'ella ha declarau eis ei pli e pli impurtont dad esser flexibels ella veta professiunala. Plazs da lavur public cun access alla reit sperta sappien esser decisivs

per tuttas branschas. Ils biars biros public «Coworking», numnadamein rodond 800, dat ei dapresent els Stadis Uni. Denton era en biaras metropol europeicas vegnan pli e pli biars biros aviarts. Per tgi ch'ei savens sin viadi e che enquera in liug ruasseivel cun pult e plaz da lavur nua ch'el sa rasar ora ils documents e sa era envidar a sesidas ei «Coworking» il survetsch beinvegniu.

[www.alpean.ch](http://www.alpean.ch)



La squadra da «Coworking Space Laax» ei semtgada per utilisaders sur-silvans e hosps da vacanzas. *Markus Boss* e *Giulia Caduff* (enamiez) cun dus collaborators.

FOTO A. BEELI